

11. november 2015

Nunatsinni meeqqat atualinnginnerminni, perorsaanikkut inerikkiartuutaasunik qanoq ilior-nikkut ulluunerani tamarmik neqeroorfigineqartarnissaat pillugu apeqquteqaat aallaavi-galugu oqallinnissamik siunnersuut.

(Inuit Ataqtigiit Inatsisartuni ilaasortaataat)

Inuit Ataqtigiit Inatsisartuni ilaasortaataanniit oqallisissatut siunnersuutaasoq soquginartoq Siumumiit imak oqaaseqarfigissavarput.

Nunatta siunissai nangitsisussagullu taakkuupput meerartagut. Tulliukkumaartut sulianut nunatta ineriartorneranut aqutsilernissamut.

Siumup anguniakkatigut pingaartitaraa meeqqat, inuusuttullu toqqissisimasut, peqqissut, tarnikkullut timikkullu nukittuut pilersinnissaat. Meeqqat tamarmik ilinniarsimasunik perorsaa-sulimmi meeqqerivimmiinnissamik neqeroorfigineqartariaqarput. Meeqqerivinni sulisut ilinni-ar-simangitsut pikkorissartittarnissaat ilinniartinneqarnissaallu isumannaartariaqarpoq. Siumup pingaaruteqarluinnartutut isigaa. Ilaqtariit meerartallit pitsaanerpaamik sullinneqarnissaat anguniarlugu.

Oqallisissiami pingaartillugu tikkuarneqarpoq meeqqat atualersimangitsut tamarmik pisortat ingerlataanni neqeroorfigineqarsinnaanissaat.

Paasivarput Naalackersuisut kommunit suleqatigalugit aallartereersimagaat nuna tamakkerlugu ingerlanneqartussamik init meeqqat atualernissaat sioqqullugu aamma meeqqat atuarfianni ator-neqartut qanoq pitsaassuseqarnerannik nalilersuisitsineq. Ininik ator-neqartunik nalilersuisitsineq taanna suliassaqarfimmi tassani nuna tamakkerlugu anguniagassat suliniutissallu pilersaa-rusiornissaannut tunngavissiissussaasimavoq, tamatumunnga aamma ilanngullugu sanaartugassat taakkualu aningaasalersorneqarnerannut siunissami akisussaaffiit qanoq aaqqissuunneqarnissaannut. Nalilersuisitsineq 2015 naalernerani naammassineqassasoq paasivarput. Meeqqanik ulluunerani paaqqinnittarfeqarnermi init pisariaqartinneqartut annertusineqarnissaannut nunaqarfinni illoqarfinnilu minnerni ator-neqartussatut 2014-imi 10 mio. kr.-it aningaasanut inatsimmi immikkoortinneqarsimapput, aningaasallu taakkua amerlaqataat aamma 2015-imut aningaasanut inatsisissatut siunnersuummi immikkoortinneqartussatut siunnersuutigineqarsimallutik.

Siumumiit aamma Naalackersuisup akissutaatigut paasivarput meeqqanut 1500-inut ullumikkut meeqqanut paaqqinniittarfimmiinneq ajortunut paaqqinnittarfeqarnikkut inissaqartitsilerniarluni sanaartussagaanni 300 mio. kr. missaani ator-neqartussaa-sapput, kiissalu taakku saniatigut børnehaveklasse-nut tamanut neqerooruteqartoqassappat tamanna 100 mio.kr.-inik ilassutunik naleqassaaq.

Taamaammat oqallisissiarineqartutut aammalu Siumumiit pingaartitatsitut ukiuni tulliuttuni aningaasalersuisarnissani tullerijiarilluartarnissaq avaqqunneqarsinnaangilaq.

Siumumniit eqqaamaqqussavarput Meeqqanut suli atualinngitsunut perorsaanikkut inerikkiartuutaasunik ulluunerani neqeroorutit pillugit Inatsisartut inatsisaat nr. 16, 3. december 2012-meersoq, aammalu 1. januar 2013-imi atuutilersinneqartoq imatut siunertaqarmat.

Issuaaneq aallartippooq;

”Pingaarnerusutigut aalajangersakkat - Siunertaq

§ 1. Inatsisartut inatsisaata matuma meeraq qitiutillugu, meeqqamullu angajoqqaatut oqartussaasut imaluunniit meeqqamik pilersuisuiusut suleqatigalugit, meeqqanut ataasiakkaanut suli atualinngitsunut pitsaanerpaamik ikorfartuinissaq qularnaassavaa, tassuunakkut meeqqap peqqissumik imaqarluartumillu inerikkiartornissaa qularnaarumallugu.

§ 2. Inatsisartut inatsisaat manna naapertorlugu meeqqanut ulluunerani neqeroorutit siunertaraat:

- 1) meeqqap inuttut, piginnaasatigut aamma tarnikkut timikkullu pisinnaasaanut naleqqiullugu periarfissaasa tamakkiisumik inerikkiartortinnissaat,
- 2) meeqqap inuttut pisinnaatitaaffinnik aamma tunngaviusumik kiffaanngissuseqarnissamut pisinnaatitaaffinnik tunngavinnillu, Naalagaaffiit Peqatigiit Isumaqaatigiissutaanni allassimasunik, ataqqinninneranik inerisaanissaq,
- 3) meeqqap angajoqqaaminut ataqqinninneranik, nammineq kulturikkut kinaassusianik, oqaasiinik pingaartitaanillu aamma nunami meeqqap najugaqarfiani nunamilu meeqqap kingoqqiffiani inuiattut pingaartitanut kulturinullu meeqqap nammineq kulturianit allaanerusunut ataqqinninnermik inerisaanissaq,
- 4) meeraq inuiaqatigiinni kiffaanngissuseqartuni akisussaalluni inooqataanissamut piareersassallugu, paaseqatigiinneq, eqqissineq, akaareqatigiinneq, suaassutsikkut naligiissuseqarneq - inuiaat, ammit qalipaataasa, naalagaaffiit upperisallu akornanni naligiissuseq anersaaralugit, aamma
- 5) meeraq periarfississallugu misigisaqarnissamut sammisaqarnissamullu - meeqqap takorluuisinnaassusianik, pilersitsisinnaassusianik inerikkiartorneranillu kaammattueqataasunik aamma pinngortitamik ataqqinnilersissallugu.

Imm. 2. Meeqqat suli atualinngitsut akornanni perorsaanikkut suliat, Inatsisartut inatsisaat manna naapertorlugu ingerlanneqartut tamarmik, angajoqqaatut oqartussaassuseqartut imaluunniit meeqqamik pilersuisuiusut meeqqamullu attaveqaataasut suleqatigalugit pissapput. Suliaq ingerlanneqassaaq atuarfimmuut ikaarsaariarluarnissaq siunertaralugu piginnaasat tunngaviusut ilikkariartornissamullu kajumissutsip inerisarlugillu tapersorsornerisigut, aamma meeqqap

inooqatigiissutsikkut nalinginnaasumillu pisinnaasanik pigiliussiniarnerani kaammattuillunilu inerisaanikkut.

Nassuiaatit atuuffiillu

§ 3. Perorsaanikkut ineriartuutaasumik ulluunerani meeqqanut neqeroorutit tassaapput neqeroorutit sammisaqartitsiviusut, meeqqanut perorsaanikkut anguniagalimmik ingerlatsiviusut, assersuutigalugu meeqqerivinni, angerlarsimaffimmi paarsisarfinni aamma angerlarsimaffimmi paarsisarfinni ataatsimoortitani ingerlanneqartut. Apeqqutaanngilaq ulloq naallugu imaluunniit ullup ilaa neqeroorutaanersoq.

Imm. 2. Meeqqat suli atualinngitsut tassaapput meeqqat 0-miit 6-inut ukiullit, imaluunniit atuarfik pillugu inatsisiliorneq naapertorlugu atuartaasussaataanerup aallartinnera tikillugu.

Imm. 3. Meeqqat suli atualinngitsut immikkut ittunik pisariaqartitsisut Inatsisartut inatsisaannut matumunnga ilaapput. ” **Issuaaneq naavoq.** ”

Siumumiit isumaqarpugut, taamatut ersarissumik inatsiseqarnitta qulakkeereeraa oqallisissiap matuma siunertarisai, taamaattorli apeqqutaalluni qanoq sukkatigisumik aammalu akissaqassuseq naapertorlugu meeqqanut tamanut neqerooruteqartalersinnaaneq qaqugu tamakkiisumik angfuneqarsinnaalissanersoq.

Taamatut oqqaaseqarluta oqallisissiamik saqqummiissut qutsavigaavut.